

Ri ruca'n carta ri xutz'ib'aj ri apóstol San Pedro

Ri apóstol Pedro xutak va ruca'n carta va chica quinojuel ri hermanos ri niqumol-qui' chica-na lugar. Chupan ri tiempo re', chupan nojuel ri iglesias xa'palaj-pa achi'a' ri xa man ja ta chic ruch'ab'al ri Dios niqic'ut, rumare' ic'o ri xquiya' can ri ruch'ab'al ri Dios. Ri Pedro nrajo' chi ri hermanos tiquicukub'a' quic'u'x riq'uin ri quic'utun can ri apóstoles. Ruma ri apóstoles can xquitamaj roch ri Ajaf Jesús, rumare' cata'n chi xtipa chic jun b'ay vave' choch-ulief. Ri nic'aj chic achi'a', ri xa man i-ketzij ta chi i-rusamajiel ri Dios, niqui'ej chi ri Ajaf Jesucristo man nipa ta chic, ruma ri tiempo xa ya xak'ax.

Ri capítulo 1:1-21 nu'ej chi ri ralc'ual ri Dios nic'atzin chi nucukub'a' ruc'u'x, nuc'uaj jun c'aslien ri inche'l nrajo' ri Dios, c'o runo'lj, nicovin nuk'il-ri' chi man nu'on ta itziel, nicach'uon, nuya' ruk'ij ri Dios, ch'uch'uj ránima y c'o amor riq'uin.

Ri capítulo 2:1-22 nu'ej chi man tiquiya' quixiquin chica ri xa man i-ketzij ta chi i-rusamajiel ri Dios. Ruma ri vinak re' xa xtika ri nem castigo pa quive'.

Y ri capítulo 3:1-18 nu'ej chi nipa-na-ve ri Kajaf Jesucristo, y nu'ej je' chi c'a maja' tipa, ruma ri Dios nrajo' chi quinojuel ta ri vinak nitzalaj-pa cánima riq'uin chi nca'colotaj.

Ri saludo

1 ¹Inre' Simón Pedro, in ru-siervo y in ru-apóstol ri Jesucristo, nitak-el va carta va chiva ixre' ri icukub'an ic'u'x riq'uin ri Jesucristo inche'l kab'anun ojre', y re' altíra rakalien. Quire' kab'anun konojiel, ruma ri Dios can choj-ve y quire' je' ri Jesucristo ri nicalo kichin. ²Can niq'uiy ta más ri favor y ri paz riq'uin ivánima ruma ja'al ivata'n roch ri Dios y ri Kajaf Jesús.

Nkojuoc inche'l ri Cristo

³Ri Dios, riq'uin ri ru-poder ruyo'n nojuel ri nic'atzin chika chi nakuc'uaj jun c'aslien otz choch jaja', ruma kata'n chic roch ri xayuon kichin riq'uin ri ru-gloria y riq'uin ri namalaj ru-poder. ⁴Y ruma nojuel

re', c'o je' ri ranun prometer chika, ri can ja'al y nem rakalien. Y ruma ri ranun prometer, nkojcolotaj choch ri itziel tak kax ri ic'o vave' choch-ulief, inche'l ri itziel tak kax ri nakarayij. Y xu'ej je' chika chi nuc'ax ri kac'aslien y nkojuoc inche'l jaja', ⁵y ixre' ri iniman chic ri Jesucristo, titija' ik'ij chi nti'an cha ri ic'aslien riq'uin ri Dios chi niq'uiy. Ixre' icukub'an ic'u'x riq'uin ri Dios pero vacame titija' ik'ij chi nik'alajin je' ri ru-poder ri Dios pa tak ic'aslien. Tivatamaj je' más chirij ri Dios. ⁶Y man jo'c ta ntivatamaj más chirij ri Dios, xa titija' ik'ij ntik'il-ivi' chi man chic ti'an pecado. Y man jo'c ta ntik'il-ivi' chi man chic ti'an pecado, xa titija' ik'ij nic'ujie' i-paciencia. Y man jo'c ta nic'ujie' i-paciencia, titija' ik'ij ntivuc'uaj ri c'aslien inche'l nrajo' ri Dios. ⁷Y man jo'c ta ntivuc'uaj ri c'aslien inche'l nrajo' ri Dios, titija' ik'ij chi nqui'vajo' ri hermanos. Y man jo'c ta nqui'vajo' ri hermanos, titija' ik'ij nqui'vajo' quinojuel vinak.

⁸Y xa nojuel re' c'o iviq'uin, man jo'c ta quire' xquixc'ujie', xa xtivatamaj más roch ri Kajaf Jesucristo, y ri ic'aslien más ja'al xtu'on. ⁹Pero xa c'o jun ri manak nojuel re' riq'uin, ya xumastaj chi jaja' ya xch'ajtaj ri ru-pecado. Xa inche'l jun muoy o jun ri man nitiquir ta nitzu'n naj. ¹⁰Y rumare' hermanos, titija' ik'ij chi nik'alajin chi ketzij ix-ayuon y ix-cho'n ruma ri Dios. Y titija' ik'ij chi cof quixc'ujie' riq'uin jaja'. Y xa nti'an nojuel re', man nquixtzak ta. ¹¹Xa quire' xti'an, can ja'al xquix'an recibir chicaj y xquixuoc chupan ri reino ri man niq'uis ta richin ri Kajaf Jesucristo ri nicalo kichin.

¹²Rumare' inre' man xquitanie' ta ninataj chiva, mesque ixre' ya ivata'n y iyo'n je' ivánima riq'uin ri ketzij, ri xc'ut chivach. ¹³Pero mientras c'a inc'as vave' choch-ulief, inre' ni'ej chi nic'atzin ninataj nojuel re' chiva chi quire' nti'an pensar otz. ¹⁴Ruma inre' vata'n chi man q'uiy ta chic k'ij inc'as vave' choch-ulief, ruma quire' xu'ej chuva ri Kajaf Jesucristo. ¹⁵Inre' nitej nuk'ij ni'ej nojuel re' chiva, chi quire' mesque inre' man inc'o ta chic vave' choch-ulief, ixre' xtalka pan ive' nojuel ri nu'e'n can.

Ri xa'tz'ato ri ru-gloria ri Cristo

¹⁶Y man quino'j ta vinak ri xkatzijuj chiva chirij ri ru-poder ri Kajaf Jesucristo, y ri xka'ej je' chiva chi ri Jesucristo xtipa chic jun b'ay. Ruma ojre' mismo xkatz'at riq'uin kanak'avach chi ri Jesucristo can c'o-ve namalaj ruk'ij. ¹⁷Ojre' oj'c'o riq'uin ri Jesús antok ri Dios ri Rutata' xu'ej chi ri Jesús c'o ruk'ij. Y xkaxaj antok ri Dios ri c'o namalaj ruk'ij xu'ej: Jare' ri Nuc'ajuol; áltira nivajo' y niquicuot vánima riq'uin, xcha'. ¹⁸Ojre' xkatz'at nojuel. Can xkaxaj chi ri Dios xch'o-pa chicaj, xkaxaj antok xojc'ujie' riq'uin ri Jesucristo paro' ri santo juyul.^a

^a 1:17-18 Mt. 17:1-5; Mr. 9:2-7; Lc. 9:28-35.

¹⁹Y c'lo je' kiquin ri ch'ab'al ri tz'ib'an can cuma ri profetas ojier can tiempo, pache' nu'ej-ve nojiel ri xca'b'anataj. Y otz chi nakaxaj re', ruma inche'l nu'on jun antorcha nuya' rusakil chupan jun k'aku'n, quire' nu'on ri ch'ab'al re', rumare' tivaxaj. Inche'l nu'on antok ntiel-pa mac'ajan yan ri estrella (ch'umil) chi nuya' sakil, quire' xtu'on ri sakil pa tak ivánima. ²⁰Y ixre' tivatamaj na'ay: Man jun vinak xtiquire' xtu'ej ri chica nu'ej ri ruch'ab'al ri Dios ri tz'ib'an can cuma ri profetas ojier can tiempo, xa manak ri Espíritu Santo riq'uin. ²¹Ruma ja ri Espíritu Santo ri x'e'n chica ri santos achi'a' ojier can ri chica xqui'ej, y man quiquin ta ijeje' xiel-pa ri xqui'ej.

Ri falsos profetas y ri falsos maestros

(Jud. 3-13)

2 ¹Ojier can, chiquicajol ri nuvanakil israelitas xa'c'ujie' falsos profetas. Y quire' je' chicajol ixre' vacame, ic'o falsos maestros xca'lka. Ijeje' xa no'l quichin vinak ri niquic'ut chivach, y xtiquire' manera xtiquire' an cha, chi quire' ixre' man ntina'iej ta ri itziel tak kax ri niquic'ut chivach. Y ri vinak re' man xtiquire' man ta chi ri Ajaf Jesús xcon chi xutoj ri qui-pecados. Y rumare' quiyuon ijeje' nicayuoj-ka jun nem castigo pa quive'; y antok xtiquire', xa pa k'ak' yan chic ic'o-ve. ²Y iq'uiy ri xca'a chiquij y xtiquire' an ri itziel tak kax inche'l niqui'an ijeje'. Y ruma ri xca'qui'an, ri vinak ri man quiniman ta ri Dios, itziel xca'ch'o' chirij ri ketzij b'ay. ³Y ri falsos maestros, ruma jo'c miera nicajo', can q'uiy tzij xtiquire' an chi quire' nqui'nimaj chi richin ri Dios ri niquic'ut; pero quire' xtiquire' an jo'c chi nicalasaj miera pan ik'a'. Pero can xca'q'uis, ruma ojier can ru'e'n-pa ri Dios chi xtika ri nem castigo pa quive', y can quire-ve xtiquire' anataj.

⁴Ruma ri Dios, ni ri ángeles man xa'ru'on ta perdonar antok xqui'an pecado, xa xa'ruc'ak chupan ri k'ak', ri lugar richin ri sufrimiento, chupan ri lugar k'aku'n. Chire' i-tz'apal-ve, quiyo'ien ri k'ij antok xca'an juzgar. ⁵Y ri Dios je' man xa'ru'on ta perdonar ri vinak ri xqui'an pecado ojier can, xa xutak-pa jun diluvio pa quive' quinojiel, ruma ri vinak re' man choj ta quic'aslien choch ri Dios. Pero xa'rucol ri Noé y i-siete (ivuku') chic vinak.^b Y ja ri Noé ri xtzijuon chica ri vinak ri chica manera niquic'ujaj jun choj c'aslien inche'l nika choch ri Dios. ⁶Y ri Dios man xu'on ta perdonar je' ri qui-pecados ri ca'ye' tanamet Sodoma y Gomorra, xa xu'ej chi ca'q'uis, y can quire-ve xb'anataj. Jaja', k'ak' xuya' pa quive' ri tanamet re' chi xa'ruq'uis,^c y xu'on chaj chica. Quire' xu'on chica, chi quire' tiquitamaj ri vinak ri xca'c'ujie' después, chi xa man xtiquire' an ta jun choj c'aslien inche'l nika choch ri Dios, xtika jun nem castigo pa

^b 2:5 Gn. 6:1-7:24. ^c 2:6 Gn. 19:24.

quive'. ⁷Pero xucol ri jun ache choj ruc'aslien ri xub'inaj Lot. Ri Lot can xb'isuon ránima ruma xutz'at ri itziel c'aslien ri xquic'uaj ri vinak ri man niquixi'ij ta qui' choch ri Dios. ^d ⁸Y ri ache choj ruc'aslien re' xc'ujie' chiquicajol ri vinak re'. Y ruma k'ij-k'ij xra'xaj y xutz'at ri itziel tak kax ri xa'qui'an, ri ránima can xb'isuon. ⁹Ri Ajaf rata'n nca'ruto' ri quic'uan jun c'aslien inche'l nrajo' jaja', antok niqui'an sufrir ruma nca'an tentar. Pero ri man quic'uan ta jun choj c'aslien, ri Ajaf xa nca'ruyac-apa richin ri k'ij antok xca'an juzgar. ¹⁰Y ri más xca'an juzgar, ja ri niqui'an ri itziel tak kax ri nca'quirayij, y nem ri castigo ri xtika pa quive', ruma itziel niquitz'at chica-na autoridad.

Man nca'niman ta y man niquixi'ij ta qui' je'. Chiquivach ijeje' man jun quikalien ri nic'aj chic. Man niquixi'ij ta qui' nca'ch'o' itziel chiquij ri c'o quik'ij. ¹¹Pero ni ri ángeles, mesque c'o más qui-poder y c'o q'uiy ri nca'tiquir niqui'an, man niqui'ej ta choch ri Ajaf chi tika castigo pa quive' ri niqui'an itziel tak kax.

¹²Pero ri falsos maestros, itziel nca'ch'o' chirij jun kax mesque man ni'ka ta pa quive' (man niqui'an ta entender). Can inche'l i-chicop ruma man niqui'an ta pensar otz. Y ruma ri itziel tak kax ri niqui'an, can nicayuoj ri castigo pa quive' y c'a chupan ri castigo re' xca'b'akave. Xtib'anataj chica inche'l ni'an chica ri chicop antok nca'tz'am chi nca'quimisas, ruma quire' ri quic'aslien. ¹³Y xtiyo'x ruc'axiel chica ruma ri nca'qui'an. Ruma k'ij-k'ij niqui'an ri itziel tak kax, y otz niquina' antok niqui'an quire'. Can i-inche'l tz'il ri c'o chirij jun tziak. Ijeje' niquimol-qui' iviq'uin pa tak va'en jo'c chi niqui'an maña chiva, y otz niquina' antok quire' niqui'an.

¹⁴Y chica-na ixok niquitz'at, can niquirayij roch. Man nak'ax ta quic'u'x chi niqui'an pecado. Nca'qui'an maña chica ri c'a maja' tiquiya' otz cánima riq'uin ri Dios, chi niqui'an pecado. Can cata'n otz chi niqui'an maña chi niquich'ec q'uiy miera. Ijeje' can xtika ri ru-castigo ri Dios pa quive'. ¹⁵Y quiyo'n can ri b'ay richin ri choj c'aslien y can i-sachnak. Can niqui'an inche'l xu'on ri jun ache ri xc'ujie' ojier can ri xub'inaj Balaam, ruc'ajuol ri Beor. Ri Balaam jo'c ri miera xrajo', mesque man otz ta xu'on. ¹⁶Y ruma ri itziel kax ri xu'on ri Balaam ri jun profeta ri xc'ujie' ojier can tiempo, can xch'olix ruma man otz ta ri xu'on. Y ja ri ru-burro ri xch'o' cha. Y mesque jun burro man nich'o' ta, ri ru-burro ri Balaam can xch'o' cha inche'l jun vinak, chi quire' xuk'at y man xuya' ta lugar cha chi xb'arub'ana' ri ruch'ujulal. ^e

¹⁷Y ri falsos maestros can i-inche'l jun nacimiento richin ya' ri xa chake'j rupan. Can i-inche'l je' mukul ri i-uc'uan ruma jun nem cak'iek'. Ri vinak re', can i-yo'ien ruma ri lugar ri k'aku'n-k'aku'n. Y richin nojiel

^d 2:7 Gn. 19:1-16. ^e 2:15-16 Nm. 22:4-35.

tiempo xtiq'ui'an sufrir chire'. ¹⁸Y niqui'an inche'l c'o q'uiy cata'n, pero xa tzij ri man jun quikalien ri nca'qui'ej. Y chi nca'qui'an engañar ri c'a jub'a' oc tiempo ca'colotaj-pa chiquicajol ri vinak ri quic'uan itziel quic'aslien, niqui'ej chica chi otz nca'qui'an nojiel itziel tak kax ri nca'quirayij. ¹⁹Niqui'an prometer chica ri vinak chi nca'iel libres, pero ijeje' mismo xa i-esclavos quib'anun pa ruk'a' ri itziel tak kax ri niqui'an. Y kata'n otz chi ri xch'ac, xa can esclavo rub'anun pa ruk'a' ri xch'acuon chirij. ²⁰Can ketzij chi ri cata'n chic roch ri Kajaf Jesucristo ri nicalo kichin, ri ya xa'colotaj-pa chupan ri itziel richin ri roch-ulief, y niquiju' chic qui' chupan ri c'aslien pache' i-alanak-ve-pa y nca'ka chic jun b'ay pa ruk'a' ri itziel, ri quic'aslien xtu'on más peor choch antok c'a maja' tiquinimaj ri Jesucristo. ²¹Ruma xa más ta otz chi man ta xquitamaj chica manera nuc'uax jun choj c'aslien choch ri Dios, que choch chi xquitamaj y xa niquiya' can ri Santo mandamiento ri xa'ruya' ri Dios chica. ²²Y vave' nib'anataj inche'l nu'ej ri jun proverbio: Ri tz'e' nalrutija' chic ri ruxa'n can.^f Y jun chic tzij nu'ej: Ri ak, mesque otz tinisan, nirub'acha' chic pa-ri' pa ch'ab'ak.

Ri k'ij antok xtipa ri Ajaf

3 ¹Jare' ri ruca'n carta ri nitz'ib'aj-el chiva hermanos ri al'tíra nquixvajo', ixre' ri ntirayij nti'an ri nrajo' ri Dios. Ri carta ri xintak-el chiva na'ay, richin chi nti'an pensar otz, y quire' je' va jun chic va. ²Chi quire' man timastaj ri qui'e'n can ri santos profetas ojier can tiempo. Y man timastaj je' ri ru-mandamiento ri Kajaf y Ka-Salvador (caloy-kichin), ri qui'e'n can chiva ri iv-apóstoles.

³Y ri na'ay ri nivajo' ninataj chiva vacame, ja ri nich'o' chiquij ri vinak ri xca'pa chupan ri ruq'uisb'al tak k'ij, ri xa ja itziel tak kax ri niquirayij niqui'an; y can xca'tze'n je' chirij ri nu'ej ri ruch'ab'al ri Dios.^g

⁴Ri vinak re' xtiquic'utuj: ¿Pache' c'o-ve ri ranun can prometer ri Cristo chi nitzalaj-pa? Ruma c'o yan tiempo ca'con-el ri kate't-kamama' y man jun ruc'axuon cha ri roch-ulief. Can inche'l rub'anun antok x'an-pa, c'a quire' rub'anun vacame, xca'cha'. ⁵Ri vinak re' niqui'an inche'l man cata'n ta ri xu'on ri Dios ojier can. Ri na'ay, ri Dios xu'ej chi tic'ujie' ri rocaj, y chi tiel-pa je' ri roch-ulief pa ya'. Y re' nuc'ut chakavach chi ri roch-ulief pa ya' c'o-ve.^h ⁶Rumare', antok ri ya' re' xq'uiy ruma ri nem job', ri vinak ri ic'o choch-ulief xa'q'uis pa ya'.ⁱ ⁷Y ri roch-ulief y ri rocaj ri nca'katz'at vacame, i-yacuon richin ri k'ij antok ri Dios xtu'ej chi tika k'ak' pa quive'. I-yacuon je' richin ri k'ij antok ri Dios xca'ru'on juzgar ri vinak ri man otz ta quic'aslien choch jaja', y xtuya' ri nem castigo pa quive'.

^f2:22 Pr. 26:11. ^g3:3 Jud. 18. ^h3:5 Gn. 1:6-8. ⁱ3:6 Gn. 7:11.

⁸Pero ixre' hermanos ri altíra nquixvajo', man timastaj chi choch ri Dios, jun k'ij xa inche'l mil juna', y mil juna' inche'l-oc jun k'ij.^j ⁹Ri Ajaf xa ya nipa inche'l ranun prometer. Jaja' man rumastan ta inche'l niqui'ej nic'aj vinak, chi ya xak'ax q'uiy tiempo y man nipa ta. Jaja' maja' tipa, ruma c'o ru-paciencia kiq'uín y man nrajo' ta chi c'o ta jun vinak nicon chupan ri ru-pecado. Jaja' nrajo' chi quinojuel ta nitzalaj-pa cánima riq'uín y niqui'an ri nrajo'.

¹⁰Pero ri k'ij antok xtipa ri Ajaf, can xtu'on inche'l nu'on jun alak'uon antok ntuoc chupan jun jay, ruma man jun ta'mayuon jampe' xtalka.^k Can quire' xtib'anataj antok xtalka ri k'ij richin ri Ajaf. Ri rocaj can altíra xtik'ajan, y nojuel ri i-cusan chi i-b'anun nojuel ri c'o, xca'c'at pa k'ak' y xca'q'uis. Ri roch-ulief y nojuel ri ic'o choch, xca'c'at je'.

¹¹Y ruma nojuel re' xca'q'uis, ixre' nic'atzin chi ntivuc'uaj jun sak c'aslien, jun c'aslien ri nika choch ri Dios; ¹²y tivoyo'iej-apa ri k'ij richin ri Dios. Can tirayij chi ya nalka ta ri k'ij re', antok ri rocaj xtic'at pa k'ak' y xtiq'uis. Y nojuel ri i-cusan chi i-b'anun nojuel, xca'ya'r ruma ruk'ak'al ri k'ak'. ¹³Pero ojre' ri kaniman ri Jesucristo, ja ri c'ac'ac' rocaj y ri c'ac'ac' roch-ulief ri kayo'ien,^l ruma jare' ri ranun prometer ri Dios. Y chire' nojuel otz y man jun itziel kax c'o.

¹⁴Rumare' hermanos ri altíra nquixvajo' ri ivoyo'ien re', titija' ik'ij chi quire' can ta sak ri ivánima, y man jun ta i-pecado nquixalrila-ka ri Ajaf. Y c'o ta je' paz riq'uín ivánima. ¹⁵Y talka pan ive' chi ri Ajaf maja' tipa, ruma jaja' c'o ru-paciencia kiq'uín, y rumare' c'a royo'ien chi quire' quinojuel ta nca'colotaj. Y ri hermano Pablo ri altíra nakajo', quire' je' ri rutz'ib'an-el chiva, can riq'uín ri no'j ri ruyo'n ri Dios cha. ¹⁶Y chupan nojuel ri ru-cartas, ic'o tzij inche'l re' ri nca'ru'ej, y ic'o nic'aj ri cuesta chi nca'an entender; rumare' ic'o vinak ri niquic'ax rub'ixic. Quire' niqui'an, ruma manak quino'j y ruma man quiyo'n ta cánima riq'uín ri Dios. Y quire' je' niqui'an riq'uín nic'aj chic tzij ri nu'ej chupan ri ruch'ab'al ri Dios ri i-tz'ib'an can. Y xa ja ri camic nicayuo'j-ka pa quive'.

¹⁷Rumare' ixre' hermanos ri altíra nquixvajo', can tib'ana' cuenta-ivi' ruma ivata'n chic chi nca'lka vinak ri quic'uan jun itziel c'aslien. Can tib'ana' cuenta-ivi', chi quire' man nquix'an ta engañar cuma ri vinak re'. Chi quire' ixre' ri iyo'n ivánima riq'uín ri Dios, cof nquixpi'ie' pan ic'aslien choch ri Dios. ¹⁸Pa ruc'axiel re', xa tivatamaj más chirij ri Kajaf Jesucristo ri nicalo kichin, y quixq'uiy c'a riq'uín ri favor ri ruyo'n chika. Y jaja' tiyo'x ruk'ij vacame y richin nojuel tiempo. Amén.

^j 3:8 Sal. 90:4. ^k 3:10 Mt. 24:43; Lc. 12:39; 1Ts. 5:2; Ap. 16:15.

^l 3:13 Is. 65:17; 66:22; Ap. 21:1.